

續修汶上縣志卷之四

西冷聞元炅續編

續宦蹟志

續叙曰昔賢居宰輔以不獲任親民之職爲歉甚哉令之關於民獨切也百里烹鮮或曰小試然河陽起花封之頌中牟有馴雉之異載在簡冊芳躅固皆可考汶邑百年來賢令接踵茂績弘猷故老猶傳誦焉詎可聽其沒沒耶採而誌之以表前徽以垂後範所不容已矣爲續宦蹟

明

汶上縣志

卷之四

宦蹟

一

范文若江南上海人丰神俊異材智超羣其治汶也以德化民以禮自持剪惡安良吏胥守法時白蓮教賊作亂陷鄆城過汶上憚公威名不敢近蓋有所以畏之也任二年調繁浙江秀水縣王 鑰陝西朝邑人下車後法令嚴肅狐鼠遁形視民如子詞訟不擾百姓愛而畏之咸如期輸稅不敢違時搜點民兵北上人情洵洵又民兵素乏束約甫出縣卽肆掠奪村人皆惶懼逃避公挺身追捕剪厥渠魁民賴以安甫一載卽調繁去任百姓追思不置

清

雷一龍北直通州人以名進士任汶性純孝太翁隨養署內每值公退食必詢所行善則有喜色否卽怒而撻之公跪而受杖以故廉慈兼施居身儉素尤喜與士子講書課藝無虛日行取授禮科給事中去之日士民遮道攀轅號呼如失怙恃

汪震元江南休寧人由功貢初任桂東順治十八年調繁汶邑廉正嚴明人不敢欺在汶九年行取刑部主事萬姓建祠勒碑以志遺愛

汶上縣志

卷之四

宦蹟

二

樊紹祚直隸文安人由進士筮任汶上嚴明沉毅強幹有守任五年吏惕民懷善政難屈指述其最著者如南旺挑濬漕渠歲需椿水數百株開壩後豪役盡據而瓜分之及挑濬時又科之里下歲以爲常民累久矣公廉知其弊于工竣卽取舊椿貯於龍王廟籍其數令廟僧扃而守之以爲來冬之用歲省民財數百金而且催科不擾無滯獄無留牘鄉城晏然羣歌樂郊行取道御史士民至今思慕不忘云

續按自萬曆戊申後宰汶者三十餘人而宦蹟所

紀僅得五人餘果無可述耶抑亦年遠事湮俾前人懿德芳規竟淪於荒烟野蔓耶且令之下丞簿司鐸各有其人其間豈無軼事堪垂善教可採者而竟無一人一事之載非畧也無蹟可覓自無據而傳也遠紹旁搜不能不望之後之君子矣

續人物志

續叙曰偉人傑士皆鍾山川之靈氣而生語云地靈則人傑豈盡虛哉汶邑諸山環聳衆水互繞加以聖人之餘澤猶新宜乎哲人挺生接踵不乏也故或登籍廟廊策勳建業或名鄉曲飭紀敦倫前固炳炳後亦籍籍下及閭巷懿行巾幗節烈靡不薄雲霄而貫金石盛矣哉今雖風俗不古而言念前徽高山可仰後之人尙其知所興起也夫爲續人物

賢忠

汶上縣志

卷之四

人物

一

明

郭朝賢字應甫歲貢生事親以孝待昆弟以友潛心理學能會周程張朱之奧當年姚江之說盛行而公能卓然不惑真學者之矜式也以理學孝友崇祀鄉賢公貢於嘉靖三十二年前志未詳爲續之

龐時雍字堯封登萬曆壬辰科進士歷任兵部主事居官剛直敢言時輔臣沈一貫專權誤國公痛恨切齒閉戶具疏劾之繕寫三晝夜始就復望家拜辭祖先乃詣闕上奏忤旨謫廣東布政

司照磨改神木縣典史已而放爲民跨蹇出都道中口占有生成誰曾是官人一落塵囂二十春幸今還我真頭面啣結何能報至尊之句旋里後杜門不出絕口世事年七十餘以壽終王命新字又新號坦山世爲汶上人公生而穎異初就外傳舉動悉合矩矱先達龐公堯封見而異之妻以 成童卽補弟子員博覽經史子集及諸儒語錄淹貫弘通稱時鴻儒癸卯領鄉薦第二人丁外艱哀毀骨立喪葬悉遵禮制家產讓之伯季惟講授生徒取束修自給至慈幃垆

旨仍自供不委也會修邑乘邑令屬以筆削褒貶紀載一本於公至今據爲信史焉庚戌成進士授常州府推官介性孤行卽臨以憲威不少屈丁內艱謝事束裝蕭然襤被徒跣千里以歸服闋補上谷司李清介執法不異於前以才品擢南京戶部主事督權維揚關惟以寬商恤民爲急改南吏部文選主事旋躋本司郎中陞大理寺丞逆黨希魏闡旨以門戶中之遂罷歸屏跡山居聚徒講學以守先待後爲已任學者稱爲坦山先生崇禎庚午臺省交薦特旨補南尚

寶卿淡情祿位長安權貴無片紙之通蓋賦性
方嚴終始不移也至治家以禮崇儉去汰僕從
皆短裋如爲布素時守令之庭絕竿牘至百姓
利害所關必正色陳之卽觸忌不恤也歿年六
十一歲通國震悼公懇各憲崇祀鄉賢併請建
特祠以誌不朽所著有千秋館文集養蒙初訓
諸書行於世

李如蘭字兼芝號瞻濤邑之草橋村人幼具夙慧
十歲能文弱冠出試卽拔前茅天啓辛酉舉於
鄉邑令范公語人曰此君行誼文章酷似其舅

今日之捷詎倖邀耶當時以爲定評蓋公固王
尚寶甥而步趨舅氏者也爲人端嚴不苟見義
勇爲庚辰辛巳饑疫頻仍公捐粟施棺義聲籍
甚旣而土寇蜂起奉兩臺檄練鄉勇爲城守計
拙於餉公首捐粟爲紳士倡兩臺列疏交薦議
以縣令用而公遽以疾逝未獲展施時論惜之
路世楨字君依大司馬元孫也生而直方風規稜
稜冲年遊泮屢厄不售因設塾講學時出與里
人言孝慈言仁讓媻睦鄉人悉化之又善星躔
知天災將至凡糠粃野菽悉覓而藏之復貨其

遠庄一區得銀糴麥貯之未幾辛巳壬午連值
荒歉饑人相食公乃出藏以濟之由是一里悉
免餓莩人皆祝公有令嗣仲子光岱果領癸卯
鄉薦諸孫皆列鬻序後起繩繩殆不可量云

高 默萬曆丙辰進士生平剛正風節稜稜初爲
元氏令正直不阿任刑部持法公平時逆閹竊
柄有所憾發公勘問欲宜之死公持平不阿觸
闖怒賴閣臣申救得降調回籍崇禎改元還公
故職風節益勵每遇大獄曹屬觀望公獨正以
折之稱平允焉遷河南府知府因前以藩王租

汶上縣志

卷之四

人物

四

解累民抗疏叅劾忤德王誹語中公遂除籍歸
娛情詩酒杜口朝政數年卒

高 熊邑庠生默胞弟也容體魁岸倜儻尚氣節
幼齡失恃能盡哀親病晝夜奉侍不懈辛巳大
饑有素負錢粟者皆爲破券不使償壬午值流
寇之亂避家壽張以材勇奉縣委守城東南隅
捍禦有方乃賊由西北隅進遂奔告其婦祝氏
曰吾屬休矣携長子出未脫而寇擁入遂被執
賊索賂則曰一死報國恩分所耳也何賂賊爲
賊怒縛之柱刀擊箭射愈奮罵不屈遂遇害

趙文炯字野雲生而穎異始入蒙塾卽能強記稍長自攻苦刻勵爲文奇峭高古跨宿儒上萬曆庚申領歲薦庚午授吳江縣丞耻爲俗吏日效藍田丞吟哦松下以詩酒爲事及歸惟載盆檜一株布襪外無餘物也有十年跋涉天涯外贏得清風兩袖還之句旋里杜門日惟以教子弟爲事壽七十四歲卒兩子堪增先後成名進士爲循吏蓋信公之庭訓爲不誣云崇祀鄉賢郭凝鼎字開澣生而岐嶷狀貌魁梧敦孝友尙氣節登崇禎戊辰進士初授任 令邑近帝都多

中貴肆行難治公執法不少屈中貴皆斂跡後有兵變率人守禦惟豪奴不遵約束公一以軍法從事遂無敢違令者城賴以全因調繁遵化時邑當殘破後十室九空公力請發粟賑濟邑賴全活後以忤權貴被劾歸里及權貴敗復起爲六合縣令未赴任而大兵臨汶或有勸速避者公慨然曰此父母之邦也可臨難棄之乎遂率僮僕登陴及城陷公殉焉邑紳士皆爲之感泣云

郭萬程字孟白大司空朝賔從孫也以貢授中書

舍人時魏客表裏爲奸陷害忠良朝臣秘謀叅劾無敢出首者公慨然曰大丈夫視死如歸何怯焉竟列疏上之觸奸怒內批以小臣出班言事廷杖削籍崇禎改元奸黨伏法公以邊材起用授南京團練副總戎遷新水師提督爲忌者所中罷歸流寇犯闕詔百官勤王授公山東協鎮謀畫未就北都失陷賊帥郭升過汶執公不屈死之公遇害時子懋趾抱父號呼求代賊憐其孝釋弗殺以故得殮公屍歸葬焉

王虛白字若谷萬曆戊午舉人崇禎辛未進士歷

任陝西洋縣直隸任長垣三縣俱有惠政行取工部主事歷員外郎中授江南廬州府知府兼攝安廬道事公爲諸生時學德兼備本學舉優行學憲以儒業優行獎之居官則以愛民養士爲心歷任不移各縣及廬州府皆有生祠誠鄉之良士國之循吏也崇祀鄉賢

郭士楨字季雅博學能文風度凝然歲薦入都有濟寧時貴欲見之人日速投刺推知可得也公竟弗屈遂試中卷以光祿署王老崇祀鄉賢

郭士棟字隆基大司空之從堂孫也弱冠食餼屢

舉于鄉弗售乃益篤志於學闡明心性之旨後
學咸宗之壬午東兵至公守東城而兵自西城
入公揮戈力戰不支乃自刎

郭士奇字鉉圃大司空之孫也少有大志駿發不
羣耽嗜詩書兼諳韜畧天啓壬戌白蓮教倡亂
陷鄆邑破滕據鄒遠邇洶洶公獻平妖十議撫
軍趙公嘉之許以諸生從戎公破產募壯士五
百餘自號忠義營直抵鄒邑遇賊三戰三捷賊
懼不敢出賊據嶧山公設計奮勇登山搗其巢
穴賊遂潰計窮出降元兇就擒撫軍上其功授

後軍都督府都事陞西曹主政遷廣西司郎中
調兵部職方司郎中奉旨提督西洋火藥局局
中漏火公肢體受傷蒙溫旨回籍調理辛巳歲
饑土寇蜂起公奮力捍禦城得保全賊平特授
鳳陽監軍道副使甫拜命具疏陳破闖十二議
以觸怒當事落職後壬午東兵臨城正指揮戰
守而城陷公獨與仲子明睿踰濠格鬪力絀皆
遇害父死忠子死孝至今傳頌凜凜如生焉

趙 堪字遜之增之胞兄也生而穎異丰姿瓌偉
幼承父命繼仲父嗣以孝聞崇禎癸丑舉於鄉

甲戌成進士除授翼城令翼新遭寇氛公下車
撫循勞來日噢咻其民均役除蠹不少寬假一
時畏若神明暇則課士若嚴師是科中式者八
人文風丕振又以流寇時警造炮具備器械勞
劇過甚卒於官翼民立祠祀之入翼城名宦崇
祀鄉賢

劉 桂字蘭臺任光祿寺署丞內篤孝友外盡忠
誠家有餘財未嘗自私生平周急恤窮捐粟施
塚被德者甚衆三舉鄉飲大賔崇祀鄉賢長子
允達早食郡餼純孝性成父亡哀痛不輟七日

食不下咽因病殞次子允徵任中書舍人值東
土饑荒奉 命賑濟實心任事務使貧民均沾
實惠事竣復 命途遇寇變被害邑人至今稱
述謂均不媿爲忠孝賢裔云

清

趙 增字無損別號講村邑次 村人早歲中副
車貢於廷戊戌捷南宮初除晉之安邑令再補
福建閩縣所至撫民育士著循聲其在閩也值
閩變初平元氣未復綏輯尤切甫歲餘卽膺兵
曹督捕之擢在部數年務尙安靜不事株連每

讞案成同列悉爲歎服尋引疾歸里惟築圃蒔
花以課督子弟爲事又喜吟咏凡生平閱歷以
及登臨眺覽悉發之於詩皆足以窺其居心制
行之端壽八十六歲歿列晉閩名宦崇祀鄉賢
衡虞衡字汝諧生而醇正誦讀不輟己亥成進士
筮仕河南固始縣寬厚愛人以不事上官罷歸
行李蕭然環堵如故夜無燈火猶時對月朗誦
開館受徒邑中受業成就者多人性嗜酒不計
美惡酣暢爲度有元亮之風子岳秀岳九均列
庠食餼以忠厚世其家

路允修字萬備號東臯迎之玄孫周道之子也以
恩貢授江南常州府通判居官以廉潔自守愛
民爲心自奉儉薄一物不妄取陞淮安同知清
操惠政無改於前適奉公赴都攫疾遂予告歸
里公爲閥閱世家而謙退溫恭絕無紈綺習氣
復慷慨好義萬曆乙卯邑大饑傾所蓄以賑全
活甚衆崇禎辛巳復大饑餓殍載道公偕弟允
釐設廠北郭煮粥以濟就食者數千人凡六閱
月所費不貲時米價騰踊復減價糶之病者給
以藥死者給以棺暴露者掩以土好善樂施事

不勝紀歿之日遠近哭奠者數千人復立石北門外以垂永久明刑部侍郎莆田王家彥有過

汶上咏路東臯賑饑詩并序

兩饗鄉飲大臯崇祀鄉賢

徐國弼字賔良拔貢生成琰之父自幼沉酣典籍以端重見知於王坦山先生常以大任期之屢試弗售因肆力問學誠於誨人多所成就士類仰之

徐振文號理鉉南平知縣成珠父也秉性質朴孝友純篤喜賑施樂排解布衣簡素遇之者不識其爲封翁也壽八十五談笑而終

岳崇功號菊菴天性孝友舉動合禮鄉里咸尊式之子峰秀宰封丘隨養署中值公壽民感宰德造銀仙爲公壽公力却之曰吾教子不貪而乃受此烏乎可皆歎息而去峰秀累官廉潔皆公教成之也又平生好生雖昆蟲草木皆不忍傷年八十六以無疾終

路允釐字張維允修弟也以捐穀賑饑特准恩貢事繼母甚孝待異母弟如同胞五兄早逝推腴產金錢以贍其孤三兄歿其子復早逝遺姪孫三人皆爲撫養成立焉晚歲益崇節儉一物不

輕用而捐施周濟則罔所惜屢舉鄉飲賓崇祀鄉賢

何 廣字環珠甲午舉人己亥進士賦性仁孝年九歲遭時荒歉雙親老憊自負米拮据供膳雙親賴之雖成人不逮也父亡竭力禮葬稍長攻苦詩書奉養老母恭事長兄十餘年不懈登筮仕豐令釐奸剔弊豪猾斂跡又善聽斷無隱不晰士民懾服誠鄉國之羽翼名教之干城也戴名振字奇珍號蜀巖登庚戌進士初任浙之縉雲令多惠政行取以部曹用甫除戶部主事而

捐館人皆惜之

路衍祐字申之訥齋其別號也爲大司馬五世孫淮陽同知允修子至性純孝步履端方篤友于敦嫻睦人皆以陳仲弓王彥方稱之尤留心掌故博聞多識爲一邑文獻表帥北遊燕臺見道多枯骨悉僱人掩埋斧資蕩然不慮也復究心岐黃得其闡奧有問疾者投以方藥無不奇中人之名益噪求者益衆不計貴賤貧富晝夜應之不厭藥裹之費歲耗多金初艱於嗣至七袞始舉子猶及見其婚娶成立咸謂爲積德之報

云兩舉鄉飲賓崇祀鄉賢

路衍淳字子復亦字敦夫別號樗菴衍祜弟也賦性慈良制行長厚與兄稱二難焉執經之暇兼精詩古文辭隨父毘陵任值母病歿於署時道路梗塞不能扶襯北旋遂藁葬宜興因移居墓次晨昏泣奠旋里後日周旋老父膝下不暫離戊戌以明經貢於廷有勸之仕者曰吾豈以薄祿疎定省耶兩罹大喪戚易交致殮葬如禮晚工臨池遠近丐墨妙者綾箋堆盈几案興至揮毫頃刻都盡得之者無不拱壁珍之庚午夏冒

暑江南扶母襯還將拮据葬事以衰年勞瘁頓攫篤疾未及襄事而歿鄉人私謚爲文孝先生崇祀鄉賢所著有展謔齋詩集并玉馬珮詞曲行於世以子貴誥封登仕郎

王瑞字冲華天性孝友早歲祇父恭兄事事如禮長而醇篤勤學文冠諸生後以歲進士授江西瑞昌訓導課士有方督率惟勤上憲重其品委署縣篆興利除弊能決疑獄士民感之爲立碑志思陞蓬萊教諭悉心作養如在瑞昌時再遷教授未任告休壽九十四歲卒

岳大武字和周幼以孝友稱入庠公舉孝行學使者深優異之明末寇亂壓境挺身入賊壘爲陳說大義賊素重之遂解去衆賴以安甲申聞闖賊入據京師與友人匿深山中誓不出時平旋家不出里門置義田贍族人儲粟濟乏設塾廣教遠近被澤者甚衆其曾孫芝於康熙乙酉舉於鄉人皆以爲積善之報所著有清河集行世岳峯秀字鎮九號克亭領辛卯鄉薦登辛丑進士初仕河南封 令以實心行實政頌聲大作六年秩滿以卓異內擢禮科給事中旋晉掌刑垣

篆前後章數十上無非爲國爲民剴切詳明大臣皆歎服之監督寶源寶泉兩局一秉公忠鼓鑄夙弊爲之一清尋援例遷葬引疾不出築小圃結茅其中日繙閱書史闡明絕學遠近之士景從者奔赴成市又凡可以利人濟物者行之不遺餘力晚著勸善恒言數十則并刻古格言爲人勸誘人皆化之崇祀鄉賢

高良士熊之子當壬午之變父罵賊死母祝氏以不辱投井死士年方十歲被擄閉奧室中後以計脫入城見父母俱被害慟絕仆地尋見弟姝

抱而泣携之返張秋于是寄弟妹鬻婢僕購棺
爲父母殯殮計時厯肆寥落有以缺角舊扉爲
棺者市之返壽張哀叩鄰里入井求母不獲悲
憤長號以繩自繫縋而下呼天入水竟抱母屍
出與父骸同殮寄厝城趾以十歲之童具此血
性宜路人爲之垂泣也遊泮後歸鄉鬻田置棺
期移櫬於故里值壬辰黃河衝決之後沮洳不
辨座處號泣錐尋三晝夜不息血誠所感錐忽
有聲啓土見棺則缺角宛然在也遷厝澠河之
村時貧甚無以葬癸卯舉於鄉又十餘年乃卜

葬襄事不遺餘力而泣血無聲幾於滅性遠近
知名士來弔者莫不感動云初署張諭遷安
東授惟捐修學宮課諸生行藝束脯不屑計也
庚申濟屬大饑撫軍檄委放齊東濱州蒲臺霑
化四縣倉穀并煮粥以賑至則實心查覈胥吏
莫欺饑民得沾實惠全活甚衆陞國子助教一
官冷落歸不聊生有詩文藁未刻行

張六部字京宜生而英敏千言立就丙戌舉於鄉
聯登丁亥進士出宰陝之寶雞邑爲南北孔道
又土著者半新招逆黨動見掣肘公剛柔互用

奸弊悉絕又驛站協濟民苦不支公力爲申處
民困以寬後爲忌者所中遂掛冠歸惟閉戶課
子弟以誘進後學爲事甲辰海寇鴟張科臣薦
公才可大用議推監軍道

命甫下而公捐館人皆惜之

郭漢鼎字慶遠士楨第六子天姿穎悟性嗜詩書
時兵燹之後典籍殘闕公獨旁搜遠稽爲時名
儒數奇不售觀光太學生平清介自持足不履
公庭而忠厚和平口不道人過推舉鄉飲賔一
時士論翕然服之長子兆麒例補翰目以情深

汶上縣志

卷之四

人物

十五

愛日不肯仕次子兆鳳現任毆寧令公之後福
正未有艾云

王辟疆字羽修尙寶卿命新仲子服習庭訓以理
學世其家明末寇亂携家他避夜行悞入賊壘
賊素重其名束炬導送之事平旋里爲族衆輸
逋家遂中落至授徒以自給掌憲青州房公可
壯稔其學欲薦之凡三勸駕不肯出時喪亂初
平喪祭禮儀多不率古乃刻家禮儀節以爲式
士大夫多取法焉邑令汪公欲延爲鄉飲賔謙
退不就益重之七十五歲卒

趙銳字穎先翼城令堪之子英異不羣孝友兼敦弱冠而孤遭世變流離遷避艱辛備歷而奉養老母無少缺時平歸里能復舊業其才可見矣夙擅文名下筆滔滔不竭年二十八歲成歲進士遠近傳其文爲式後授萊州府訓導未仕卒士林惜之

路光岱字雲麓領癸卯鄉薦授雲南易門令生平醇良樂易與人無忤而好善喜施留心時事又精堪輿凡山水情形無不深悉所著汶城議山川議土田議一冊圖議詳明續修邑乘多採入

汶上縣志

卷之四

人物

十六

焉居官則宣揚

聖諭嚴禁苞苴興利除弊盡心教養惠政多端未竟厥施卒於署崇祀易門名宦

杜若蘭字蘅洲歲貢生天性孝友值歲歉以美食供父母及兩幼弟而自甘粗糲且排難解紛恤孤憐貧皆爲人所不能爲由是鄉黨欽服共稱爲邑士仁人焉

郭文亮字炳星震櫬子也賦質英奇秉性孝友年十二隨父訓導公於陵縣歲餘訓導公捐館哀毀盡禮徒跣數百里扶襯而歸時土寇蜂起經

行綠林叢中哀感群盜竟無犯者抵里後無力
襄事乃寢處柩側勵志攻苦旣采芹丁明季之
變念三兄早歿一兄被擄親喪未葬孤姪未成
立獨以一身支持事皆就緒且篤親念故人莫
不敬而愛之晚好施與多義舉如修學宮葺奎
樓繕橋梁濟饑掩骼難更僕數子兆垣成進士
爲邑令皆公積累之報也崇祀鄉賢

趙 鑄字象九生而厚重不佻幼失恃隨父走東
西艱苦備歷長補弟子員事繼母盡孝家徒四
壁立力田供饗殮弗少缺父歿撫三幼弟一妹

友愛篤至其待從兄弟亦敦友于如同胞讓產
諸弟而自拮据以致殷實鄰里姻戚咸沐恩義
督學周特舉優行殆古仁人君子之儔與

趙 瑤字仲聲號西園翼城令堪之孫萊州府訓
導銳之子也四歲失怙稍長就外傳端重不佻
事必咨母而後行不則咨於長兄孝友之稱早
歲洋溢補郡庠弟子員屢試冠軍文名震一時
著四字文訣爲後學法式壬午以第二人舉於
鄉居家持正不阿士林重之方期共扶搖益上
而遽赴玉樓之召惜哉有二英詩集并小題稿行世

何其健歲貢生賦性孝友居心仁愛人稱厚德及
任堂庠惟以修學宮育人材爲事所入常不足
以自供棠之人士至今思之

馬繼曾字宗魯幼而岐嶷潛心學問出筆驚人膺
辛卯選拔授平江知縣時西征軍興供給駢集
民不堪命公多方籌畫省費不貲民賴以甦平
江士民至今歌思之

李方明童年孝友少孤事伯父母如父母愛堂弟
如胞弟遇宗族鄉黨無所忤誘進後學循循不
倦本學扁旌曰四科首選洵實錄也羣惜其僅

以明經老焉

路松年字承甫生性孝友天資仁厚冲年入庠家
鮮遺業苦志誦讀事母盡孝長兄早亡無嗣以
巳子爲之繼又好義樂施汶河水決首倡義舉
築堤捍衛永免水患泊筮仕同安愛民禮士修
朱子祠四關各設義學闔邑士庶莫不感頌告
致旋里年七十以壽終

路衍豫字子順以貢監候選縣佐天性仁孝友愛
備至幼失恃度母沈氏鞠之長事度母如母四
伯無嗣寄襯荒園者六十年偕諸姪備禮葬之

祖瑩待羣從兄弟悉若同胞又自處謙和待人寬恕從不爲誑語欺人遠近悉愛慕之

郭震樾字聚五壬午歲貢任陵縣訓導爲人孝弟慈祥與物無忤髫年能文工書弟士棟殉難後遺產頗豐悉讓諸弟姪無所問居官誠於誨人視士如子有一生誤陷於獄公力爲請免後以數金爲壽公力却之署縣事有扞城功上官方欲保薦而公以年老告歸以壽終邑人思其德公請崇祀鄉賢

王鵬程字自溟潛心詩書學問優長兼輕財好施

汶上縣志

卷之四

人物

十九

被德者至今感之以歲貢司訓在平除月課諸生外創立義學凡生童貧不能習業者悉傾私囊贍資督課一時成就多人年八十五卒於官闔學士子無不哀痛哭送足以徵公德教之所感矣

閻翼典登州教授補宸之子也幼有至性格遵庭訓讀書以實行自勵諸姪早孤撫之如子開館受徒一以躬行倡率故從學者多爲端人惜其未獲展用以明經老焉

武功附

房天駟以墾荒有功授高臺所守禦千總髫年盡孝居官盡職且能興起文事實心愛民誠武功之表表者用附賢忠之後以彰遺德

劉爾變賦姿英偉秉性寬仁生平濟急扶危排難解紛事難屈指數常願人安而已乃安年雖老而志不衰德積於身報彰於後以長子汶遠貴封宣武將軍長孫鎬亦任浙江烏程邑令乃躬膺榮貴而接人益恭享年八十九歲稱爲義士仁人何愧焉

趙澤因堪之子以增生人太學廣教育喜施濟惠

義之風有足多者

孝義

馬 璨邑庠生父繼曾任平江令卒於官值三藩告變不能奔喪乃設位於廬晝夜號泣亂少平卽徒步出門間關兩月始達訪旅襯不得泣欲死遇老門役乃曾事其父者指示之 血以驗舁以行道遇餘孽掠其資舁夫悉逃計無復之乃火化納竹籠中自負以行是役也徒跣往返六千餘里棲無襪被行乏裹糧囚首跣足幾死者數非天祐純孝幾何不作他鄉鬼也卒使旅宦遊 得歸首 宜通國共推其孝云

張仲泰庚子科武舉人大受次子也父奉 差赴滇仲泰從焉父病卒於汴水驛殮畢納棺父同差者勸之曰去家萬里扶襯良難不如從北俗火化囊負而歸至便也仲泰泣不忍卒以棺歸每飲食或過山渡河必跪告如事生抵家盡出父餘貲無所私一切家事獨以身理俾兄弟皆得肆力於學及一兄兩弟皆入庠同爨終身怡怡無間真不媿孝友二字云

李霽霄賦性淳龐胷襟曠達生平好義樂施其大者如捐粟賑荒築堤 田代貧人輸賦免其鬻

子不可枚舉宜乎善人義士之稱遠近傳頌也
前邑令甘謚以懿惠并爲文以表其墓亦不沒
人善之意云

侯輔世邑鄉耆也父名其新係庠生爲豪家誣害
繫獄輔世年甫成童痛父非辜赴官哀求再四
願以身代當事憐其孝爲雪寃得脫時家貧如
洗而竭力奉養不少缺年至頽白猶然孺慕之
誠又善撫幼弟延師受業早年遊泮一叔早亡
遺一子并爲保養成立使守其業孝友之風真
不愧古人矣

宋淑琬天性孝友善事繼母母亦視若已出敬事
兄長有事必竭力助之兄歿視姪及姪孫撫育
有加又好施與壬午大饑量出所有賑濟鄉鄰
賴以存活者甚多今年已九十有五而壯健猶
昔子孫盈庭或游泮宮或登鶚薦邑人悉頌爲
積善之家餘慶不爽焉

趙壘交炯之子補增廣生志甘淡治兄及弟皆遠
任獨居家事親敬養備至終身遵遺訓弗忘焉

蕃衍人皆謂福善之報云

孔興義字君方 至聖六十六代孫儀質魁梧慷
慨有大志由恩蔭初任揚州通判值兵變薄城
一時鼎沸公竭力捍禦籌畫有方賴以無虞事
平以能調大同府中路通判地逼京畿夙號險
隘公悉心釐剔遂成坦途任三年賢聲大著會
丁王母艱回籍服 遽以疾卒惜哉

孔毓璋字 石 至聖六十七代孫器宇軒 賦
志不凡由恩貢筮仕江寧府北捕通判興革綏
靖賢聲丕著以督臺薦陞昌平知州地近畿甸

汶上縣志

卷之四

孝義

三

內多屯田民不堪命公挺然執法十載之內百
姓安堵以盜案罣誤回籍適逢

聖駕南幸泊舟於汶公躬迎河岸復蒙

特恩授安州知州下車後蠲稅築堤正供外毫無所
私不幸病卒於官士庶皆爲之太息焉

孔興範字鳧先 至聖六十 代孫賦性倜儻志
氣豪邁幼而孤事孀母以孝聞由恩貢初任孟
縣令興除利弊民稱慈母累官順德知府歷任
皆有善政清白自持家徒四壁卒之日棺槨衣
衾悉大宗爲之營辦廉吏洵非虛云

招集四方名士一時掇巍科者多出其門焉
王所賓邑歲貢生幼有至性仁孝夙成值明季之
變四郊寇攘不避艱險負父竊逃及遇賊梗哀
號願代父死寇亦感其孝釋之迨承平歸里蓄
積頗豐值康熙四年汶大饑餓殍滿道公捐糧
千餘石全活多人享年九十餘歲而歿鄉人士
至今傳頌弗衰也

趙銑字石生督捕主政增之仲子也生而倜儻有
器識廣交樂施絕無貴介習氣膺歲薦隨父安
邑署中事無巨細悉代父籌畫至嘔血不言瘁

兄鉅艱於嗣以巳子繼之無難色病甚旋里及
疾革仰天號曰兒終不得見父矣越夕父以任
滿歸家既相見遂瞑目而逝人咸謂誠孝所感
云

林宗義字仲路邑太學生茂名知縣盛梅之次子
幼而岐嶷成童卽善承父訓勵志問學文聲震
一時以隨父遠宦遂屈就太學非其志也侍父
官署一切皆殫心經理毫無所私及父病卒於
任義以清白吏子扶柩旋里僅給衣食而周急
濟貧樂施不怠潛跡田園日惟課訓子孫更念

三弟乏嗣以一孫繼之其孝友好義均足風世也

趙錡邑庠生少孤母董氏痛夫成疾生百計奉侍冀得其歡并破產以營醫藥晝夜候侍不稍懈母歿葬祭悉如禮哀戚逾常人兩兄皆異母產事之甚恭一弟尙幼撫恤彌篤其敦友于也悉孝心之所推也前任知縣汪 以純孝旌之蓋不誣云

劉國瑄邑庠生幼聰穎異常童孩提時即能得親心冠娶後父母委以家事一切曲意承志無稍

拂父母病晝夜侍湯藥衣不解帶及親歿哀毀骨立見者莫不哀而敬之二弟早亡子俱幼生撫恤備至後俱成立克繼家聲前任知縣應給扁旌曰純孝可風邑縉紳先生咸爲序傳之誠堪爲人士矜式也

趙淵太學生少孤與妻徐氏事母克孝恤弟殫誠能使仲弟瑤成名季弟濟有後大節炳昭他可知矣

趙鈺太學生孝事繼母友于昆弟育寒士以成名卹貧乏而還產胞叔講村以樂善從吾好不欺

明 心許之信然

徐成琰拔貢生孝友清介授福建上抗縣丞攝篆
武平連城梗頑胥化以賑饑忤當事病歿于道
賴三邑釀金喪始歸胞弟歲貢生成瑄以德行
文章顯授高密訓導未赴而卒至今邑中稱爲
二難

皆

寄籍賢忠

孔衍鈺字泗寰 至聖六十六代孫目其祖貞寧
移家汶邑再傳而誕公居心坦易賦性豪邁遇
人有過輒面折之胸無留滯也親友有急難則
扶掖不倦 國初補太常博士主鬯聖澤書院
受事之後整廟貌肅明禋供職之外絕不與外
事至利弊所關則侃侃而陳無所忌邑宰皆敬
禮之公年十九卽失怙時有弟四人及兄之孤
皆幼穉公於兵荒饑疫間奉萱堂撫弟皆無遺
憾年五十猶殷孺慕母病顛天求代躬親侍奉

一切不假手僕婢及丁內艱擗踊哀號晝夜不
絕弔者見其瘠毀無不嘖嘖稱孝焉七十五歲
告終鄉黨莫不哀慟後請於 上憲崇祀鄉賢
孔毓珍字席玉 至聖六十七代孫四歲失怙郎
知悲泣稍長端凝沉靜不苟言笑識者以大器
目之後以恩貢授直隸保定府通判時于公成
龍巡撫畿輔以公清勤數以盤錯試之公牒到
卽行案無留牘在任七年六攝劇邑實心實政
從不肯以五日京兆自待年三十六歲歿于官
空囊無以備棺殮賴上憲同官及士民賻助老

母弱孤始能扶襯返里焉

孔興洪字涵萬 至聖六十七代孫由恩蔭筮仕
陝之商州牧廉明子惠士庶感頌內擢刑部員
外郎馬首北矣適關中兵變將軍圖海奉
命徂征廉知公能會督撫交章題留爲平慶道司
餉軍前徵調支發不勞而辦行間士賴之無庚
癸呼事平計功以丁祖母艱回籍服闋補江南
江鎮常道整躬率屬百寮聳畏兩攝藩政一署
鹺務端方自持無毫髮私陞直隸口北道副使
兵戢民安循聲徹 輦轂間蒞任半載卽有閩

臬之擢惜乎叱馭江行竟罹覆舟之慘碩抱未
展時論痛之曲汶兩邑皆祀鄉賢

孔興榮字華先 至聖六十六代孫賦性仁孝六
歲失恃悲痛逾成人年十九以 恩授國子監
學錄供尼山祀事立品端方遠邇傳頌壬午之
變土寇猖獗皆相戒勿犯其第且素抱經畧爲
邑令鍾公陳禦寇之策行之畢效全活多人邑
賴以安課子姪嚴而有法長子毓璽襲公職克
紹前徽次子毓基以 恩授枝江令有善政行
取候補皆公庭訓所貽也年七十四而卒

辛秉和秉恒兄弟俱邑庠生家傳孝友四世同居
家口百餘從無間言唐之張公宋之鄭氏不是
過矣當明季凶荒流離滿目生兄弟施粥捐粟
全括甚衆時土寇肆行搶掠復築堡禦難鄉里
多賴以自存而且葬殉忠之邑侯恤貧宦之亡
友德義益隆墳箴齊美洵士林之模範足永垂
不朽者也以下續入賢忠

梁國柱劉許地方鄉民也天性孝友家雖貧孝養
雙親常變不二親沒廬于墓側不忍離掬土築
墳崇高如 年八十七卒次子忠能繼父行親

病晝夜侍奉飲食湯藥必嘗而進及親歿朝夕
哭於墓側三年未嘗一至其家國柱行孝於前
忠又承之於後是可以媿夫世之讀詩書知禮
義者矣一門雙德輿論信不誣云

路周道字遵治大司馬迎之曾孫也賦性仁孝苦
志吟哦髻齡郎出筆驚人稱名下士後登萬曆
戊戌進士筮仕直隸清豐令冰蘖自持毫不可
干以私歷任刑工兩曹咸稱厥職及陞湖廣藩
叅屬吏素稔公威名無不悚惕奉法稜稜風節
蓋始終不替云歸居林下雅意造士廣起書院

節烈

續敘曰殺身成仁惟志士仁人能之骯髒男子一死爲難而乃責之巾幗弱質乎然而血性所發百折不撓固冰霜爲操實日月同輝矣誰謂栢舟之矢不可與龍比爭烈哉善善欲長凡邑之以節烈見者皆錄焉用以勵人心敦風化奚不可者

何氏邑庠生何祝齡女爲廩生王登長子婦登有三子長曰璲次曰珮三尚幼璲娶氏未幾歿氏急欲死翁姑曰若果有志待吾二子珮有子當

爲立嗣氏頷之珮甫娶明經女劉氏復天何與劉閉戶爲自盡計翁姑環泣謀以幼子寄養伯氏與二媳偕死焉氏不得已暫出奉養旣而謀於劉曰我兩人俱失所天何以生爲然翁姑憊矣不可以失養汝健而才能事二人我孱質也宜一死以明志會值璲三週忌氏治具奠於墓還而自經閱歲劉氏亦鬱鬱病歿後直指表其門爲一門雙節焉

李氏尚寶卿王公之冢婦也夫元中攫疾垂危氏諭梓人制棺者曰濶之令可容吾兩人由是人

知其必死聞於其父曰眞吾女也聽之及元中卒氏一慟之餘從容投環時萬曆丁巳冬也邑人士屢爲請表尙寶公曰吾門素風耳詎望旌哉洎尙寶公歿始聞於各憲撫軍題其墓曰奇節可風復爲繕䟽請旌

樊氏王尙寶公側室也性婉嫵善接事上下王公疾革氏預告以相殉遂謝絕飲食閱六日公歿闔戶自縊家人破壁救甦泣曰若輩知生我不知成我也主母命所生女號泣留之不顧竟投繯而逝時年二十八歲抱衾裯而賦烈腸更足

汶上縣志

卷之四

節烈

二

多焉

郭氏貢生郭衡藻長女贈按察僉事孔衍銘妻也幼嫻女則于歸後以賢孝稱壬午師破汶城衍銘被殺氏伏屍號泣且奮罵殺其夫者求與俱死兵義之不忍殺氏坐卧屍所不少離兵退家人逃散獨力脫簪珥市棺以殮夫屍時年二十七也遭世變家中落則勤紡績治女工以上奉孀姑下撫遺孤卒能教子成立爲名臣通國推母儀焉

焦氏馬乾吾副室也嫡生二女無子焦氏生子纔

數月而乾吾歿時焦氏方二十餘歲嫡病垂危
囑二女曰汝二人幼我死事焦如母二女泣諾
及母歿女以母事焦退不敢當事乾吾老母彌
謹撫養嫡女無或不周教其子慈而嚴又善持
家日益殷富邑人列其行事請旌誤稱繼室氏
恚不受復據實改正年八十餘歿邑人龐主政
王尚寶皆有詩弔之尚寶併贈以序言見藝文
曹氏明中書舍人劉允徵之妻允徵爲寇所害氏
聞變卽投井自殞皎皎烈腸固至今如生也

烈女郭氏歲貢生郭衡藻三女也許字王尚寶公

三男爲妻未娶而夫歿氏自殲焉節烈固難得
之十五歲室女更足多矣按院上其事於朝敕
旌之有未室烈女郭娥之門在賈伯村郭氏家
廟之東

王氏路如母妻丙子孝廉王公賢之曾孫女也如
母病亡氏方二十歲誓以死從柩親老子幼勉
聽翁姑命茹荼拮据不辭艱辛養親撫孤年六
十餘以疾終

趙氏路鵬起妻堪之女也年二十餘歲而夫故一
子方幼堅志守節撫孤子衍慶入庠生二子次

爾共亦入庠經歷艱苦五十餘年年八十而終
胡氏歲貢生趙銳妻堪子婦也年二十八歲而寡
撫三子皆讀書有成事八十老姑始終無懈戊
申地震時闔家居樓上轟聲如雷磚瓦飛動人
皆逃避氏獨以身蔽姑幼子啼於旁不顧也俄
而樓崩氏被壓死老姑獲全其幼子徧體打傷
竟不死後聞于縣蒙旌獎焉

王氏尚寶公之孫女適李聖植爲妻聖植遭明季
之亂承憲委捉賊誣陷冤死時氏方二十一歲
日夜痛泣逾兩月生一遺腹子喜夫有嗣多方

保護後避難遇賊恐受辱遂舍子地上投井中
幸水淺不死迨出井覓子已不見矣痛哭訪之
越二年始得撫養成立爲之娶妻丁氏三年生
一孫子復死丁年二十歲氏痛欲絕又念孫未
周而媳少哭謂丁曰我與若俱恃此子矣卽李
氏一脉亦惟恃此子矣若能善撫之否丁亦哭
告姑曰姑今雖無子我斷不令姑再無婦也遂
盡力奉姑守志撫子兩世苦節輝映冰霜真堪
垂芳百世現今子孫繩繩知苦節之報不爽也
辛氏儒童林爲煥妻十九歲于歸越一載而煥病

氏侍奉惟謹後見夫必不起卽誓死不移及夫歿視含殮畢卽自縊于側殆從容就義者欵

李氏庠生王士旂妻時值兵變士旂被害氏時二十七歲立志守節奉翁姑撫幼子姑李氏病卧三年氏躬侍湯藥晝夜辛勤再事繼姑陳氏亦然連歲荒歉艱苦萬端撫育二子慈誨交至長子鵬舉名列泮宮次子鵬里亦成德器人皆重之徐氏貢生趙銑妻增之仲子婦也銑歿氏二十九歲生二子二女立志守節奉事翁姑撫養子女慈而嚴子泝湛俱成立補弟子員二女皆有家

汶上縣志

卷之四

節烈

五

年六十餘歲仍勤苦不倦以壽終

于氏生員高良謨妻十五歲于歸二十一歲而夫故氏誓以身殉絕粒數日乘防護稍踈竟自經死直指奏於朝奉 旨旌表建坊沙河涯墓前祝氏生員高熊之妻年二十六歲隨夫居壽張壬午城陷熊遇害氏慷慨臨井子女四人皆挽衣哭留氏揮手曰汝等速逃生我惟有一死遂投井事載壽張志

王氏生員高良棟妻壬午居壽張城陷乃以幼子授乳媪并給金一錠曰好携持之高門有後不

汝忘王氏爲祝氏姪婦與祝同投一井死後壽
張令扁其門曰一門雙節

田氏鄉民王虛誠妻十五歲于歸二十一而喪偶
時值兵荒携一子一女東西流離拾草子以自
活事平拮据撫孤竟易農而爲儒不惟克存夫
後而且再造夫家享年九十三歲天之報苦節
爲不爽矣

高氏鄉民尙起蛟妻也起蛟兄弟五人遭繼母之
虐已殺其四矣起蛟懼不免逃之河南氏方少
有子四齡口爲姑所陵避之母家起蛟永無音

耗氏食貧茹荼撫孤成家守節七十餘年至九
十九歲而終

烈女郭氏貢生郭衡藻女十五歲許聘高夢弼爲
妻未婚而夢弼卒女悲泣絕餐誓必死父母防
之屢欲縊不得閱十餘日以頭觸地氣遂絕齧
齡弱質矢皎日而殉同穴不足媿鬚眉丈夫哉
若姊若娣烈出一門尤爲難矣巡按奏聞奉
旨援例給銀建坊表其墓曰未室烈女高夢弼妻郭氏

墓在次 東坊在賈北村郭氏家廟旁

劉氏庠生王嘉賓妻崇禎壬午嘉賓歿於兵氏年

二十九歲聞夫亡慟絕五日不食誓以死殉時翁猶在堂泣諭之曰汝死固全節但我已衰而汝一子一女皆未成人如此老幼何氏勉從翁命忍荼自守躬績紡以供菽水凡衣食必以美者奉翁而子女則僅免饑寒而已人皆憐其節而欽其孝今其孫及曾孫皆列鬢序固氏慈教之所貽也

龍氏高大運妻也大運卒氏二十歲爲有遺腹不死閱月生子念夫有嗣且翁姑老矣卽死誰爲事誰爲育者遂堅心守志歷三年翁姑相繼歿

時頻罹荒亂家業凋零以一身携稚子拮据喪葬備極艱苦後教子成人苦節五十一年而歿張氏鄉民高磊妻娶七年而磊歿氏時二十三歲守一子一女以居夫兄睨其產屢逼改適不從後子亡兄乃合匪棍強嫁之給氏出掖之驢上至野見人衆覺其詐遂大呼觸地披髮以死拒之路人聞于其弟志誠率族衆奪回欲鳴官弗果惜貧落不能自存賴志誠贍養終身得全其節焉邑進士兵部主事趙公增率紳士公扁其門曰苦志矢天

曹氏廩生郭明睿妻壬午之變明睿殉難時外侮
內患疊遭不測氏歷盡艱辛卒撫孤有成年八
十以壽終

楊氏庠生郭維鼎妻壬午維鼎殉難氏年二十五苦
志撫子克守祖業子兆瑞入庠 承宣領壬午鄉薦
檀氏庠生郭愛鼎妻愛鼎殉壬 之難氏年二十矢
志苦守撫兩男一女紡績自給壽躋期頤邑人多之
張氏邑人郭文毅妻壬午兵變文毅被掠去氏方
十九歲子懋功尚未週氏保抱逃竄備歷辛苦
卒底成立歷年七十而卒知縣孟據實詳旌未下

續氏賢裔榮光先妻結褵二月值兵火之變盜入
室欲害其姑氏以身救至重被刀傷不顧也盜
感其孝並釋之無何夫死貧無以葬氏典質衣
飾竭力襄事貧窘莫措則晝夜紡績採薪以養
姑撫孤守節六十餘年年八十四歲終

韓氏邑人夏三友妻二十而寡無子家甚貧紡織
自食苦守五十餘載詩云之死靡他氏之謂矣
孫氏儒童劉沿妻嫁二載夫死止生一女年方二
十甘心守志歸寧母家父母以姑息之愛爲謀
他適氏聞之不及回夫家卽自縊一死完行雖

烈丈夫何媿焉

胡氏生員趙士傑妻士傑死胡氏欲從恐人阻之
迨夜乘隙自縊於柩前

路氏鄆庠生王宅坦妻同知允修女也壬午之亂
夫歿于兵欲擄氏搶地奮罵兵欲殺之則延頸
迎刃無怖色兵義之曰真烈婦也釋之且解所
佩刃懸于門以戒後來者越數日兵退乃携刃
去同室婦女四人皆賴以全

姬氏鄉民王廷奇妻未二十而夫死守節撫孤姑
欲奪其志堅不從家貧無以供朝夕晝夜紡績
以奉公姑者二十年撫子成立且有孫翁姑歿
棺殮殯葬悉氏拮据人皆欽其節孝焉

烈女王氏二人乃伯叔姊妹一爲王應期女一爲
王應昌女長未字幼方垂髻流賊過汶掠二女
扶之馬上長女罵不絕口賊刳其腸而死之幼
者亦泣不從賊賊並殺之有碑記見在文廟
孫氏歲貢生楊穀兒婦也未屆一十夫病垂危氏
誓以死從自結一繩及夫死氏卽縊於側
續氏鄉民張士俊妻年二十四歲夫亡無子剪髮
守志苦歷四十餘年而卒

郭氏生員房維垣妻十九歲而夫故止有一女閱月餘產遺腹子一值壬午兵變饑寒流離備嘗艱苦卒撫子成立邑令王公扁獎曰玉節冰操王氏邑人房元妻年二十而夫歿無所出氏剪髮隨葬復剪耳自誓公姑哀其志爲嗣一子使撫之

劉氏馬繼孟妻年二十二歲而寡撫一子一女奉堂上兩世孀姑不避艱辛終始不渝邑令尚公扁獎曰節比松筠

馮氏鄉民伊務敬妻壬午城破夫歿於兵氏年十

七歲矢志守節艱苦自勵撫孤成立歿後上聞奉旨旌其墓

姚氏童生張茂蘭妻夫故無所出誓從夫死父與姑苦勸不從竟投繯焉時年二十二歲

楊氏生員闞翼經妻壬午寇亂欲虜之氏罵賊不屈遂被殺

李氏邑人徐斌之妻二十九歲而寡有子方數月氏矢志守節以奉姑撫子爲已任時比歲荒歉菽水維艱親操作歷險阻以婦代子以母兼師歷年六十餘歲而歿康熙乙未邑人士具呈上

請奉 旨給銀建坊以表其門

李氏儒童岳文運妻嫁之次年生一女而文運歿
姑以家貧且氏無子諷以改適不聽復授意其
母使勸之氏歸寧父母以爲言氏不待騎卽抱
女徒步至家泣拜姑曰旣不諒我何復苟延也
有問女呱呱於室姑往視之已雉頸死矣

烈女趙氏滋陽孝廉趙嵐曉女許配邑庠生郭升
鼎之子年及笄矣郭生子遭繼母之虐出亡於
外七年不返其父謀於夫家別爲議婚不以告
女媒氏及新議者以聘來婢偶洩之遂給婢他

汶上縣志

卷之四

節烈

十一

往鍵戶自經

烈女劉氏貢生劉國瑞女許字庠生路瑤之子泗
元爲妻桃夭有期柏舟頓賦女于聞訃三日乘
父母往弔遂自經於室

烈女劉氏鄉民劉嘉玉女許聘畢懋德爲婚未娶
而夫故父母往弔女乘隙自盡於室

烈女陳氏陳士簡女許配徐蘭桂子秉宏父若翁
皆鄉民也女未笄而秉弘歿女矢志殉節于夫
歿之三日乘隙自縊而死

李氏生員郭世祿妻祿亡氏十九歲無出繼夫兄

子邦域以延夫嗣苦守五十餘年卒

馬氏邑人郭祖儀妻年十八歲夫亡撫遺腹子廷然艱苦備歷以全節終

王氏郭廷然妻廷然早亡氏方十九歲撫遺腹子克有成立能嗣徽於姑焉

鄒氏邑人岳聲妻年二十四歲而夫亡孝翁姑養孤子至七十二歲而終

任氏鄉民趙魁芳妻夫故氏方二十一歲孝親撫孤守節終身八十餘歲而歿

許氏河標守備劉誠遠妻誠遠故氏年二十四歲有子

汶上縣志

卷之四

節烈

十一

未週篤志守節教子國瑞成名苦守五十餘年而終

張氏節孝張仲泰妻仲泰故氏生子莢矢志撫孤善事老姑子稍長爲延名師教之故莢早歲入庠成名士著述爲多士式莢婦趙氏能事姑莢歿孝彌篤鄉人皆以爲趙之賢張之報也

烈女劉氏年九歲許字於路泗源爲妻越六載未成婚而泗源故女聞訃卽絕食求死欲與夫同穴迨五日縊而殞邑令甘扁獎云貞節全人

郭氏監生路衍紹妻衍紹死氏年二十九歲盡孝

翁姑撫三男四女皆克成立不媿節孝

路氏儒童徐克讓妻嫁甫數月夫染篤疾氏知夫必不起遂告翁以相殉之意并歸家辭其母兩家知其必死預爲防護及夫歿數欲死皆賴家人救不得遂翁憐其志急爲立嗣冀以維之氏曰承翁意死何必今日也迨三週詣夫墓哭奠歸拜辭翁且馳告其母曰兒之遲遲共死者念吾夫早逝莫爲服三年喪者故暫留此身以侍香火耳今事畢矣敢辭遂絕粒九日而畢命

郭氏儒童徐廣恕妻恕病危氏年十九誓矢柏舟

汶上縣志

卷之四

節烈

十三

恕喜強起謝之及夫歿苦志撫孤備歷艱辛教子成立

劉氏鄉民崔旺命妻嫁三年而夫亡無子夫兄夫婦皆故遺子二人長明桂三歲次明煥未及一週氏以無倚之孀婦代爲撫育視猶子如已子相依者四十六年迄今明桂兄弟子孫滿堂而劉氏之皎節終身一日允堪入志以垂不朽

王氏岳峯奇妻奇死時氏年二十二歲子生僅二歲初氏欲死翁姑諭以撫孤乃勉從命以奉親撫子爲任名其子曰貞示志也自是食貧作苦

刻苦不暇歷五十五年如一日知縣聞 給扁
旌獎復蒙撫憲題請奉

旨給銀建坊旌表其門

周氏邑人路青選妻青選歿氏年二十七無所出
氏矢志殉夫因夫柩未葬朝夕哭奠及次年冬
既卜葬期氏於前一日自縊於柩側闔縣公舉
節烈本縣以死生全節扁獎之

公氏孔興仁妻氏年二十六歲興仁以恩蔭赴監
途次遇害氏聞之卽爲自裁計姑泣謂之曰我
已六旬汝孤方四歲汝死則老幼何所倚氏勉

汶上縣志

卷之四

節烈

十四

從姑命孝慈兼盡子毓珍後以恩貢任上谷別
駕能遵母訓善于職不幸又早逝遺子五人皆
幼氏與子婦郭氏殷勤撫養不惟五孤成立且
家計日豐壽八十而終遠近無不賢之

蔡氏馬雲路之妻氏年二十三歲夫歿上有衰親
下有遺子氏誓守孤幃以盡仰事俯育之責時
值饑饉雖丈夫不能濟而氏以青閨弱盾獨力
支持不惟節而且苦矣壽八十七歲前邑令尙
額其門曰遺節遐齡邑令應給扁曰霜操鶴筭
洵不誣云

何氏邑人馬坤之妻娶三載而坤故氏年十九歲念雙親在堂弱女在抱誓勵冰操翁姑憐其年少且無子命之他適氏矢志靡他雖貧窮不少移也壽九十歲卒節同松栢不足風歟

張氏鄉民于尚玉之繼室張文玉之女也尚玉病死上有老母下有前妻幼子氏年二十二歲決計養親撫孤不少移時值歲荒乃文玉迫于饑寒陰受楊姓金欲奪其志議既成以告氏氏念去則喪節不去則吾父何以謝楊氏乃號泣升車抵楊室郎托病人房見壁有懸刃遂取以自

刎死後葬楊氏塋中袁家口閘官黃夜夢一婦人哀懇之有轉達縣主歸原夫墓之語閘官訪實爲言之康熙五十五年知縣聞喚其子問得其故隨捐俸令移柩合葬原夫之墓以成其志云

侯氏邑民楊培素妻十六歲而娶十九歲而寡無所出念翁姑老而無依又家計涼薄遂忍死日紡績以供菽水翁姑死拮据喪葬皆克襄事若氏者真可謂之苦節矣

程氏楊文林妻于歸三載而夫故時氏年二十歲

囚有遺腹欲爲夫延一縷之脉遂留身以事翁姑越五月果生一子矢志撫孤守節更傾囊勸翁娶妾以廣嗣姑病則祝神願代尤爲婦人所難歷四十七年以終閭里無不傳頌焉知縣聞

給扁旌獎復蒙撫憲題請奉給銀建坊旌表其門

孫氏儒童劉謙之妻謙歿氏方十九歲爲有遺腹不死後生一女遂奉姑撫女越十年以女付姑曰前之不死者恐以女累姑也今女漸成人媳將從夫地下矣姑委曲勸之不移歸家辭母卽自盡于母家一死全節烈矣哉知縣聞據公呈給扁旌獎

汶上縣志

卷之四

節烈

十六

王氏鄉民楊之俊妻年二十三歲而夫故時二親在堂雙雛在抱氏堅心守貞以盡孝慈屢遭飢荒艱苦萬狀氏百計支持卒使仰事俯育無缺歷四十年而歿鄉人莫不重之

路氏武生李如梅妻十八歲于歸二十五歲而寡盡孝公姑撫訓二子食貧作苦四十年如一日宜輿論共推其節孝也

李氏鄉民李彩妻也二十四歲而彩亡時舅歿姑存氏奉養克盡教其子淑白慈而嚴今淑白名著譽序皆氏教誨力也

胡氏趙坤妻坤亡氏二十八歲無子止生二女矢志守節年六十餘而歿

曹氏庠生林瑞之妻二十五歲而夫亡苦志守節上事老姑悉盡禮下撫弱子成立爲之娶妻李氏不幸子復夭殤李氏亦秉貞烈卽欲殉夫姑泣諭之曰我無倚若果有志何不且留撫女以伴我也氏遵命孝慈兼盡數十年來婆媳苦守紡織度日真不媿雙節矣閭邑公舉到縣知縣聞 給扁旌獎

李氏鄉民王承寵妻年二十六歲而承寵故氏上

汶上縣志

卷之四

節烈

十七

事翁姑下撫二子苦志三十餘年宗族鄉黨咸稱述不亡云

袁氏鄉民孫學妻年二十二歲學歿氏奉事公姑撫養幼子苦節四十餘年鄉人稱之

曹氏孔興智妻幼失怙恃亦鮮兄弟以孤女而殯葬父母咸克如禮已爲難矣迨適興智甫三年生子方六月而興智遂亡氏矢志冰霜仰事翁姑俯育幼子歷七十餘歲而卒今其子毓德孫傳心讀書成名何莫非氏教訓之力也

傅氏王澤長妻于歸時翁已故惟孀姑在堂小叔

一人尚在襁褓氏委曲奉姑撫叔孝義兼盡後
姑歿叔僅七齡氏恩勤鞠育無少懈踰年而夫
亦殂氏時二十五歲無所出痛不欲生又念王
氏一脉惟弱叔在我死叔將何倚遂葬夫忍泣
撫養及長爲之婚娶王氏一門至今蕃衍者皆
氏之所貽也

程氏鄉民張銓妻十九歲適銓越二載而銓亡止
生一女氏堅志守節奉養翁姑其伯張敖嘉其
志以三子張璉繼氏以承銓祀時璉方一歲氏
艱苦撫育歷三十餘年而終前任知縣尙 扁

獎節孝可風

向氏鄉民徐獻珍妻年二十五歲夫亡矢志守節
公姑爲立其叔子房齡以承夫嗣家徒四壁朝
不謀夕氏勤紡績以養親撫孤歷數十年而繼
子有成家道克昌人共頌其節孝焉

連氏邑民房正升之妻十六歲而娶甫二載生
子而寡氏歷艱難窮厄始終不移壽七十四而終

房氏郡庠生龐述先妻也夫故時氏年二十八歲
遺二子二女氏善事翁姑撫育子女享年六十
餘歲而終

李氏路衍祺妻十七歲于歸廿三歲而夫亡遺孤三人上有孀姑氏矢志靡他時遭明季荒亂同伯逃避江南扶姑携子雖患難流離中不使姑缺於供厥後返里躬親紡績延師教子長子億年三子松齡皆補弟子員而次子松年成名儒爲同安令孰非母教有以成之耶

梁氏四氏學生員孔尚齏妻年甫二旬夫故生遺腹子衍樞氏以守節自誓孝事翁姑迨翁姑既歿殯葬如禮教子不事姑息嘗以紡績之積延師課子故衍樞得補四氏學弟子員而冢孫興

義以恩蔭授大同府中路通判著賢聲遠近胥頌母德焉

孝婦劉氏武庠邵成美之妻生自蓬門未習女誡乃于歸後卽能孝事病姑其夫出外數年未歸又值水災之後家無餘粒氏恐姑愁苦增病罄其衣飾以供甘旨而自饜糟糠始終奉養不衰宜乎四境人士交口稱頌也知縣聞 給孝行可嘉扁以示獎勵

王氏鄉民續邦傑妻十九歲適邦傑越二載生子方數月而夫歿於盜時堂上有翁姑懷中鞠

弱子而家計蕭條氏百計拮据以爲仰事俯育之資乃十指勤苦而衣食漸饒亦天之所以報之也享年七十二歲而終

節壽

郭氏庠生王虛心妻也虛心遭壬午兵變遇害一子士俊亦被擄去氏時二十九歲痛夫呼子幾不欲生後幸葬夫而子逃回遂守志撫孤歷七十九年享壽百有八歲康熙四十五年郡守李給百齡扁旌獎

房氏吳珍之母孝敬夙著節操克終年登百有五

汶上縣志

卷之四

節烈

二十

齡誠人世所罕覩者也宜勒邑乘以昭

國朝之瑞現在詳請題達建坊

董氏鄉民張國用妻十九歲于歸二十二歲夫亡無所出念姑早亡而翁尙存欲殉夫則老翁何恃以養于是堅守貞節奉養老翁二十年不少懈怠翁歿竭力殯殮復啟其姑棺與翁合葬祖塋閭里咸欽頌之節與孝均足風焉以下續文節烈
張氏生員林沫洙妻于歸時年十九歲越三載而夫故氏僅二十二歲無子誓以死殉氏又念公姑無依遂矢志奉養以代子職未幾翁姑相繼

而殞氏冰操愈堅族衆感慕以長房一子繼其翁復以二房一子爲其夫嗣氏撫養備至無少偏私及長分產令繼子延芳以膏田讓叔此尤人情之所難也

高氏程遠方妻也十九歲于歸越三載值壬午之變夫死于兵僅遺一子年未週名曰彬先是氏見夫被執厲聲罵詈求與夫俱死軍人義而釋之後聞夫遇害覓屍不獲晝夜哀泣結尸以葬迨事平力撫幼子勉力課讀何意彬方授室復天遺一子僅數月氏偕孀媳拮据撫育乃孫甫

三歲而孀媳復歿氏撫弱孫艱苦備嘗卒使孤孫成立克繼書香苦節洵足傳也

劉氏邑民劉五車妻也夫歿時氏年二十一歲矢志守節上事耄年公姑下撫襁褓二子歷艱辛者五十餘年今七十有五猶強健不衰可稱德彌邵而年彌高者矣

王氏生員孫綽之媳秉仁妻也仁歿時氏年二十二歲生一子一女矢志堅守無何子女亦相繼亡綽因家貧遊學遠方氏拮据支持姑歿極力營葬儼然一閨中丈夫也今六十五歲矣四十

餘年之苦節允堪入志以風世

于氏歲貢生林宗智妻也氏二十四歲夫歿志守孤幃事孀姑撫幼子膝下有孫猶紡績是勤宗族鄉黨莫不嘖嘖稱頌之

李氏畢逞妻適二載而逞歿時上有病姑下有前妻子甫三歲氏堅心守節姑歿喪葬盡禮課子國賓慈而嚴俾得名列泮宮皆氏仰事俯育之功也

辛氏邑民丁盛會妻年二十七而夫故氏矢志靡他孝以事姑慈以撫子且竭力殯葬祖公祖姑

以及公姑之生養死葬咸克如禮歷今八十有四苦節五十餘年芳名洵堪不朽云

周氏武舉田天祥妻十七歲於歸善事舅姑二十九歲而夫亡氏晝夜悲泣不食舅姑泣諭之曰汝子幼而我夫婦老何勿念其大者氏遂忍泣撫子事親數年無少拂舅姑病則祝天求以身代歿則喪葬悉如禮邑人士重其節孝合詞公舉前任知縣雷 以節孝雙全扁其門誠實錄也

趙氏四氏學廩生孔毓堃妻前節孝婦徐氏仲女

也幼而端莊于歸後能得翁姑歡佐夫讀書有聲庠序堯歿氏年二十八歲絕粒數日誓從夫死其兄湛泣告之曰妹死固善如幼甥何遂勉進飲食教二子慈而有禮咸克成立邑人欽重之以爲不媿阿母云

林氏邑民李維翰妻也生一子甫六月而翰歿氏年十九歲矢志靡他高堂賴之以成人苦節幾三十年而終

王氏鄉民張鼎妻年二十一歲而夫歿志守孤幃堂上惟孀姑是倚一夜盜入室將縛姑氏從蚕

室挺出曰家事我掌勿驚我年老姑出簪珥衣飾付盜盜感其孝而去姑年六旬染癱疾氏左右不離雖溺垢不嫌污寒暑不辭瘁姑至八十餘歲而終皆氏孝養之力也遺一子早夭謀諸近族繼堂孫以承宗祧其明於大義又如此今已七十三歲苦節五十餘年宜鄉里咸以節孝嘖嘖稱頌云

續按明宗伯吳公曰朝廷旌表之典原爲愚夫愚婦發潛德之光以風世耳若士大夫家何人不當爲節義者名言哉乃後世則惟顯有力者獲邀而閭巷中多泯泯矣安得如吳公者起而正之茲於輿論所推備爲採之俾巾幗芳型雖不得盡邀國典而垂諸簡冊或不至數歲而後湮沒無傳也

卷之四終

汶上縣志

卷之四

節烈

二十四